



In brigadier, in cusseglier guvernativ ed in cumandant da corp: Peter Baumgartner, Christian Rathgeb ed Aldo C. Schellenberg (da san.).
FOTOS G. N. STGIER

«Ella ha imprimì il maletg da l'armada»

Brigada d'infanteria da muntogna 12: Davos rapport

DA GION NUTEGN STGIER / ANR

■ **A la fin da quest onn è la Brigada d'infanteria da muntogna 12 per adina istorgia. Cun il svilup da l'armada (WEA) va il temp da quella truppa a fin. Ina buna part dals schuldads vegn suentar a far ses servetsch militar en autras truppas e trais battagliuns, quels svaneschan complet.** La Brigada d'infanteria da muntogna 12 è vegnida introducida il 2004 cun la sedia principala a Cuira. Dad ella han fatg part radund 7000 uffiziers e schuldads da sis chantuns. Da quel dumber eran bunamain 45% uffiziers e schuldads dal Grischun. Dapi il fanadur 2017 è il brigadier *Peter Baumgartner* stà cumandant da quella truppa, ditg pli concret il davos cumandant. Venderdi passa ha el envidà a ses davos rapport e lura er a la cerimonia da cumià da la Brigada d'infanteria da muntogna 12.

Buna lavur a San Murezzan

Cun paucas excepziuns hajan schuldads ed uffiziers ademplì l'ultim onn il pensum, ha ditg il cumandant Baumgartner. Tar sias visitas tar las truppas haja el vesì schuldada motivada e cunzunt er cun buna disciplina. Ils schuldads dal battagliun 65 sajan stads engaschads avant, durant e suentar ils Campiunadis mundials da skis il favrer passà a San Murezzan. Lur lavur

saja stada exemplarica, i saja vegnì lavurà professional e cunzunt er flexibel. Quai che pertutga il svilup da l'armada (WEA) vesa Baumgartner ina buna furmazion e scolaziun sco chausa la pli impurtanta per ir cun l'armada en in avegnir da success. Da nov vegn quella ad avair a partir dal 2020 be pli 100 000 schuldads. Er cun ina reduziun dal dumber da schuldads, l'armada viva vinavant, ha ditg Baumgartner. Ella vegnia er en il futur ad esser acceptada tar la populaziun, quai conferma ina retschertga fatga nua che 84% da las persunas dumandadas vulan in'armada.

Strusch realisabels

Christian Rathgeb, il schef dal Departament da giusta, segirezza e sanadad dal Grischun, ha engrazià als quatter cumandants, als uffiziers e schuldads da la Brigada d'infanteria da muntogna 12 per lur servetsch prestà a favur da la segirtad da la Svizra e cunzunt dal Forum mundial d'economia a Tavau. Ultra da quai meritan tuts in grond respect per la lavur prestada a chaschun da gronds events che na fissan strusch realisabels senza l'engaschament da l'armada, ha ditg Rathgeb.

Bler dapli che be in'associazion

La Brigada d'infanteria da muntogna 12 saja stada blier dapli che be ina truppa ed in'associazion militar che haja reuni

trais linguas e trais culturas. Na, ella saja stada ina organsiazion militar che haja collià ina gronda rait, promovì l'aspect social ed in bun spiert da nossa societad. Ultra da quai saja quella truppa stada en vair senn persunalitad, fidanza e cunzunt er segirtad. Ultra da quai haja ella imprimì il maletg da l'armada sco strusch in'otra truppa, ha punctuà Rathgeb.

Passiun ed amicizia

Pleds fitgs emozionals èn er vegnids d'*Aldo C. Schellenberg*, il cumandant da corp e da nov vicecumandant da l'armada svizra. El ch'è stà in dals quatter cumandants da la Brigada d'infanteria da muntogna 12. Ella vegnia ad ir en l'istorgia sco ina truppa militar da gronda passiun, ina forza ferma, plain bregia, cun ina responsabladad exemplarica e lur er cun ina amicizia grondiusa. Schellenberg, el ch'è per intginas emnas anc cumandant da la truppa aviatica da nossa armada, ha er cusseglià als uffiziers e schuldads, che han fatg fin oz lur servetsch en la Brigada d'infanteria da muntogna 12, da cuntinuar lur carriera militar cun la medema tenuta, cun il bun spiert da la brigada e lura er restar en il cor adina schuldads ed uffiziers dal «12». Quai sajan premissas adequatas per ir en ina outra «era» militar senza la Brigada d'infanteria da muntogna 12.



Brigadier Willy Brülisauer, il cumandant da la Brigada mecanisada 11 che ha da nov sedia a Cuira, cun Urs Marti, il president da la citad da Cuira.



Anteriusas personalitads da las truppas «12» a chaschun dal davos rapport da la Brigada d'infanteria da muntogna 12: Martin von Orelli, Valentino Cramer, Peter Näf, Jon Andre Tgetgel e Lucas Caduff (da san.).



L'actual president dal cussegl grond e trais anterius: Martin Aebli, Elita Florin-Caluori, Christina Brini ed Ueli Bleiker (da san.).



Peter Baumgartner surdat ad Aldo C. Schellenberg la bandiera da la Brigada d'infanteria da muntogna 12 sco act final da la festa da cumià da la brigada.



Da sis battagliuns da la Brigada d'infanteria da muntogna 12 èn trais a la fin da quest onn istorgia.



Primcolonel Damian Casanova.